

雲間志

（全二冊）
朱端常等修

卷之四
（全）

光緒甲午

徐氏校刊

閑 緇
志 熙
萬 季

(即閑字)



重刊雲閒志序

宋時華亭一縣兼有今松江一府一廳七縣之地而猶未止也何以言之曰雲閒志所管十三鄉雖與今同然今十三鄉所管止四十八保而雲閒志乃有五十二保閒嘗攷明正德府志自西南境楓涇鄉一保以次左旋迄西北境海隅鄉五十保而止如櫛之比區畫井然以證雲閒志各鄉所管保數合者十有一鄉其不合者惟仙山鄉三保新江鄉四保正德府志各殺其一今按仙山地居腹裏新江雖鄰嘉定而與修竹海隅各保遞厠無閒是雲閒志所溢之數不溢於五十之外而溢於五

十之內必無是理殆舊本傳寫之誤未可知然較之今所管四十八保尙遺其二則據

國朝康熙府志云北亭鄉三十二保海隅鄉四十八保皆分隸嘉定今北亭之三十一三十三保暨海隅之四十九保竝與嘉定錯壤是華亭舊地猶可按圖而索予故曰兼有今松江一府一廳七縣之地而猶未止也特康熙府志不詳分隸於何時而嘉定縣志并所分隸者而不知意者其在萬厯改并青浦各鄉之際顧未一見崇禎府志不知詳焉否乎若嘉慶府志則并分隸之說而芟之矣古人志地之書首重疆理班孟堅爲地理志

重述禹貢古文豈不憚煩哉不徵於古不信於今也雲
閒志詳敘封域鄉里猶有古之遺意柰何後之人於因
革之大端漫不加察耶雲閒有志據楊潛自序固不自
潛始前於潛者眇不可知後於潛者湮滅抑多矣而潛
書乃僅而得存不誠吾邦之幸事哉沈氏刊版燬於寇
書存亦眇曩預修志之役展轉假得表弟謝君斐章爲
予錄副珍諸篋笥忽忽十餘年徐觀察子靜見而愛之
因憇愚重刊席君孟則朱君懋之相與校理始癸巳仲
冬迄甲午暮春乃竣厥事邑人閔萃祥書於上海寓次

重刊雲間志序

國家集四庫書載諸宋元方志而宋楊潛雲間志以後
出不得預其書按據舊圖經搜羅古碑碣詳載故實題
詠書僅三卷繁簡得中不讓宋人會稽新安志也余自
嘉慶癸酉有松江府脩志之役病舊志之不能典核因
求松江事迹惟華亭一縣見於王象之輿地紀勝至元
升縣爲府始載其事於嘉禾志并楊潛之書爲一郡掌
故康熙閒知府郭廷弼作郡志本之明人顧清及陳繼
儒時亦似見此二書者而改易其文又多舛誤如沿革
蘇州增大厯中改爲雄州建中元年復名蘇州等語竝

不知雄州之爲郡望如縣之有赤緊非州名也其諸山則刪節雲閒志高若干丈周回若干里不知古人測量之法古迹則誤以雲閒志靜安寺記有赤烏中建號漚瀆重元寺之文遂譌爲有赤烏碑知縣題名輿地紀勝有唐蘇籀引晏公類要云攝華亭令在官簡惠莅事公正亦見雲閒志郡志僅載其名刪其在官莅事之迹又雲閒志張聿無以進士任之文包某德宗時蓋缺其名郡志改包某爲包何刪德宗時三字雲閒志宋知華亭縣商餘慶劉唯一等名下俱有咸平五年景德元年等字郡志反刪落在官年分雲閒志進士題名唐有三禮

科顧謙郡志脫之其布衣被召賜第及特奏名者皆遺
落不載其所引古書不載出典以意增改其文不及更
僕數也則知雲閒志之不可不刊以行世也明甚余病
今世脩志無箸作好手不如刻古志於前以後來事迹
續之或山川古迹舊有遺漏舛誤者不妨別爲考證一
卷華亭沈司馬恕者好古士也家有古倪園構求古書
藏之出示此志後有錢少詹大所題記因余言卽付之
梓他時恐郡志之成卒不及古人矣書中譌缺得顧茂
才廣圻是正之又校以至元嘉禾志庶得十八九考輿
地紀勝尙有寶雲寺碑在華亭縣南卅五里又有大唐

蘇州華亭縣顧亭林市新剏清雲禪院記大中十四年
歲在庚辰吳興沈璠述并書又有亭林法雲寺感夢伽
藍神記慶歷六年記碑文皆不見雲間志恐今石亦并
亡矣顧茂才又檢古刻叢鈔有華亭唐故陸氏盧江郡
何夫人唐故陸氏劉夫人二墓誌銘及戴府君墓誌俱
可補爲雲間故迹者聊因序錄此志并及之時歲甲戌
陽湖孫星衍撰於治城山館

雲閒志序

華亭爲今壯縣生齒繁夥財賦浩穰南距海北瀕江四境延袤視偏壘遐障所不逮質之寰宇記輿地廣志元和郡國圖志僅得疆理大略至如先賢勝概戶口租稅里巷物產之屬則闕焉前此邑人蓋嘗編類失之疏略續雖附見於嘉禾志然闕遺尙多元空觀覽余謬領是邑雖日困於簿書期會而此心實拳拳今瓜代有期不加討論以詔來者則鞅鞅不滿若將終身焉於是甄邑之博雅君子相與講貫疇諸井里考諸傳記質諸故老有據則書有疑則闕有訛則辯凡百里之風土粲然靡

所不載至若前輩詩文散落於境內者非一姑撫南渡
以前者附於卷末書成而鋟墨公帑匱而莫能舉又得
邑之賢士大夫鳩工助成是書也雖一邑之士未足以
廣見聞異時對友朋則可以資談麈事君父則可以備
顧問孰謂其無補歟紹熙癸丑仲冬旦日奉議郎特差
知秀州華亭縣主管勸農公事兼兵馬都監兼監鹽場
主管堰事借緋楊潛謹序

嘉慶壬申余擢守雲閒適有脩志之役因訪求松乘遺
書竊見元明以來有僅存其目而無其書者如大德松
江郡志至正續松江志洪武吳郡志及永樂新志是也
成化雲閒通志前志屢爲稱引雖有傳書而存者已尠
惟紹熙雲閒志徐碩嘉禾志二書自宋迄今數百年幸
少闕佚而此邦文獻亦藉以資攷證今嘉禾志已刊
四庫書目世閒祇有影鈔善本雲閒志雖晚出自竹汀
少詹購鈔後藏諸袁君廷壽家得岷雲司馬重付剞劂
表章之功甚偉夫書之顯晦存乎其時非得好學深思
之士愛而傳焉則名山之業就湮者多矣雲閒有志昉

自楊潛其體裁最爲縝密顧陳諸志往往取材於是宜
竹汀諸公歎賞不置沈君十峰成其兄岷雲未竟之業
而屬序於余余嘉其汲古功深能繼其事誠如惕夫王
君所云議新志不若刻舊志余輯郡志適成而益歎古
人之不可及也是爲序戊寅六月下浣宋如林書於郡
署之海石堂

雲間志上

封域

華亭在禹貢爲揚州之域在周爲吳地吳滅入越越滅入楚秦併天下分三十六郡始屬會稽郡漢世因之順帝永建四年分浙江以東爲會稽郡西爲吳郡華亭雖吳郡地猶未見之史傳孫氏霸吳盡有其地建安二十四年封陸遜爲華亭侯始見之吳志矣晉宋齊梁未之改易隋平陳始置蘇州迨唐天寶十年以華亭爲縣屬蘇州治按新史寰宇記以爲本嘉興縣地輿地廣志以爲本崑山縣地

崑山卽漢婁縣梁大同初易今名

元和郡國圖志云吳

郡太守趙居貞奏割崑山嘉興海鹽三縣爲之今邑之

四境與三縣接郡國圖志爲不誣矣僖宗入蜀時羣盜

槃結王騰據華亭

唐周寶傳王敖據崑山王騰據華亭寶練卒自守發杭州兵戍縣鎮按僖

宗幸蜀則中和元年也

其後吳越王錢鏐遣顧全武拔之自此地

入吳越

按九國志顧全武平嘉興取崑山雖無拔華亭事通鑑乾甯四年錢鏐遣顧全武取蘇州乙未

拔松江戊戌拔無錫辛丑拔常熟華亭

晉天福五年以嘉興縣爲秀州而

割華亭隸焉

按置秀州五代史云晉天福中寰宇記以爲四年吳越備史五年三月敕升嘉興爲

州而以華亭及新置崇德隸焉則備史年月差詳云

至於縣之得名通典寰宇記

云地有華亭谷因以爲名按陸遜傳遜初封華亭侯進

封婁侯次江陵侯漢法十里一亭十亭一鄉萬戶以上